

124930

REGIÆ MAJESTATIS BORUSSICÆ
LITTERAE
PATENTES,
QVIBVS
NOVA REI JVDICIARIAE
TAM SAECVLARIS, QVAM ECCLESIASTICAE
CONSTITVTIO
IN
TERRIS PRVSSIAE
ET
POMERANIAE,
A REGIBVS POLONIAE HVCVSQVE POSSESSIS,
NEC NON IN
TRACTIBVS, CIS AMNEM NOTESIVM,
SEV NOTEZAM SITIS,
AD MAJOREM POLONIAM HVCVSQVE RELATIS,
OMNIBVS NVNC
AB AVGVSTISSIMO BORVSSIAE REGE
OCCVPATIS ET VINDICATIS,
ANNVNCIATVR ET NOTIFICATVR.

DATAE BEROLINI DIE xxviii. SEPTEMBRIS MDCCCLXXII.

TYPIS GEORGII JACOBI DECKERI, TYPOGRAPHI REGII.

CHINESE LIBRARY

124930

III 65



552.2.1933/7



FRIDERICVS Dei Gratia Rex
Borussiæ, Marggravius Brandenburgensis,
Sacri Romani Imperii Camerarius et Princeps Elector,
Supremus Silesiæ Dux, Princeps Supremus Arausionensis,
Novi Castræ et Valengiæ, nec non Comitatus Glacensis, Geldriæ,
Magdeburgi, Cliviæ, Juliaci, Montium, Stettini, Pomeraniæ,
Cassubiorum, Vandalorum, et Megapolis, nec non Crosnæ Dux,
Burggravius Norimbergensis, Princeps Halberstadii, Mindæ, Ca-
mini, Vandalii, Suerini, Raceburgi, Ost-Frisiæ et Mursæ, Comes
Hohenzolleræ, Ruppini, Marcæ, Ravensbergi, Hohensteinii,
Tecklenburgi, Suerini, Lingæ, Buræ et Leerdami, Dominus Ra-
vensteinii, Rostochii, Stargardæ, Lauenburgi, Butoviæ, Arlayæ
et Bredæ, &c. &c. &c.

Significamus omnibus, quorum interest, postquam legitimi dominii, publica
scriptione exposito et demonstrato jure, detentas hucusque injuste a Regibus
Poloniæ, et ab avito domus Nostræ patrimonio vi iniqua avulsas terras Prussiæ
et Pomeraniæ, nec non ad majorem Poloniæ huc usque relatos districtus, cis
amnem Noteſium seu Notezam ſitos, nimirum:

- 1) Warmiam,
- 2) Mariæburgensem ditionem,
- 3) Culmensem ditionem, districtu Micheloviensi comprehenso, exce-
pto Thoruno, ejusque territorio,
- 4) Pomerelliam, ejusque ambitu comprehensos tractus, cis Noteſium
ſeu Notezam ſlumen ſitos, excepto Gedano, ejusque territorio;

iterum vindicavimus et occupavimus, præstitumque jam Nobis est, ceu legitimo domino et imperanti a provinciarum et ditionum harum incolis, cuiusvis dignitatis et ordinis, sacerdotalibus, æque ac ecclesiasticis, homagium, ac fidelitatis et subjectionis juramentum: nullam magis regium Nostrum animum urgere sollicitudinem, quam eam, ut efficiamus, quo jus in hisce Nostri imperii regionibus in posterum cuilibet, sine personarum respectu et discrimine æquum dicatur, et quo provinciæ illæ, Nostræ dominationi recens subjectæ, insignis ejus felicitatis reddantur participes, qua reliqui Nostro imperio subjecti populi gaudent, ut nimis judicia exerceantur non modo sancte et integre, verum remotis quoque omnibus ambagibus, et ea celeritate et festinatione, quam accurata causarum forensium disceptatio patitur, et litigantium expectatio flagitat.

I. Non concedit igitur ista, quæ Nobis in primis cordi est, cura, istudque studium justitiæ intemeratæ Nostrum, ut subditorum, Nostram in tutelam et protectionem noviter receptorum vitam, salutem, libertatem, fortunas et bona decantatæ omnium querimoniis, et ab ipsis Polonis rerum suarum scriptoribus atro colore depictæ, judiciorum, huc usque constitutorum, violentiæ et tumultuariæ ac perturbatæ procedendi rationi, ab accurata causarum dirimendarum via adeo deflectenti et abhorrenti, porro exponi sinamus; omnia potius, quæ huc usque viguerunt, et hisce provinciis jus dixerunt, judicia, quocunque nomine uia fuerint, nimis judicia terrestria, judicia castrensa, judicia palatinalia et vice-palatinalia, judicia querularum, judicia capitanealia, judicia arcium, judicia episcopalia, judicia capitulorum ecclesiarum cathedralium et collegiatarum, aliaque hujus generis, penitus tollenda et evertenda esse, censuimus, et vigore hujus sanctiōnis tollimus, evertimus et abolemus, iisque omnem jurisdictionem, auctoritatem et potestatem abrogamus et adimimus sine causarum discrimine, sive publicæ sint, sive privatæ; adeoque omnes etiam provocationes et appellations ad superiora, quæ hactenus provocationes ab illis receperunt, judicia, ad judicia specialia comitiorum provincialium, ad comitia, quæ vocarunt, particularia, ad conventum generale, seu comitia provinciæ generalia, ad judicium provinciale superius, ad Tribunalia Poloniæ, extra provincias hisce constituta, nimis ad Tribunal, quod Petricoviæ sedem habet suam, ad judicia assessorialia, ad judicia relationum, ad aulam et consistorium Regum Poloniæ, sponte ultroque cessant et expirant, easque penitus abolemus, abrogamus, vetamus et prohibemus.

II. Ob eandem rationem subditos, Nostro imperio noviter subjectos, eorumque vitam, famam, libertatem, securitatem, patrimonium, fortunas eo periculo et discrimine liberare constituimus, in quo ob legum juriumque, huc usque in hisce regionibus usu vigentium obscuritatem, incertamque et mancam rationem versabantur, et in quod per turbulentum perversumque judiciorum statum et procedendi modum quotidie adducebantur. Omnes igitur, quæ huc usque in hisce provinciis et ditionibus, Nostro recens adjectis regno, viguerunt, usque obtinuerunt leges, omnesque constitutiones et sanctiones, quibus vel ipsa ciuium jura, vel negotiorum et actuum ciuilium forma et solemnitates, vel ordo judiciarius definiuntur et præscribuntur, a die publicationis patentium harum litterarum, earumque virtute, penitus abolemus, abrogamus, proscribimus, et intuitu futurorum, quæ in posterum ab hoc inde die suscipiuntur et expediuntur, negotiorum, omni auctoritate, valore, et obligandi potestate privamus et denudamus.

III. In locum vero horum jurium abolitorum surrogamus & substituimus eas leges, constitutiones, sanctiones, eaque jura, eumque judiciorum & processus forensis ordinem, quibus Regnum Nostrum Borussiæ huc usque usum fuit, idque eo convenientius aptiusque judicavimus, quo consultum magis & naturale Nobis videtur, provincias & ditiones, nunc vindicatas à Nobis & occupatas iis in posterum regi legibus, quibus olim jam illarum pleræque ius fuerunt, cum adhuc partem constituerent Regni illius, cui nunc denuo uniuntur & incorporantur.

Eadem

Eadem igitur Regni Borussiae jura, eandemque administrationis rei publicae rationem, quae in illo obtinent, in acquisitis & recuperatis recens ditionibus etiam, certis tamen sub modificationibus & definitionibus, introducimus & stabilimus, eamque normam & regulam unice a novis subditis observari jubemus.

IV. Quum igitur ad fundamenta administrationis imperii Nostrri referatur & pertineat ratio illa, ut illius partes distincte separantur, adeoque reddituum omnium publicorum, fisci ærariique cura, politiae universæ moderamen, & totius œconomiae publicæ direætio collegiis Nostris cameralibus & domanialibus universim, speciatim vero certis & particularibus, quas vocant commissionibus & deputationibus, pro rerum diversitate nomen inde proprium fortientibus, demandentur & delegentur: pertinent etiam & perpetuo in ditionibus hisce occupatis pertinebunt, juxta fundamentalem Nostram & pragmaticam sanctiōnem ea de re die XIX. Junii, Anni MDCCXLIX. promulgatam, ad curam, administrationem, moderamen, jurisdictionem collegiorum Nostrorum domanialium & cameralium causæ & res, sequenti enumeratae & recensitæ indice:

- I. Tributa & collationes, harumque distributio, exactio, peræquatio, &c.
- II. Vectigalia & portoria.
- III. Accisiæ.
- IV. Nemora regia ac sylvæ domaniales, venatio in iis, ejusque emolumenta.
- V. Cursus publicus, seu Postæ.
- VI. Res monetaria.
- VII. Res metallicæ, & proventus metallifodinarum.
- VIII. Salinæ, & salis vendendi ratio.
- IX. Monopolium regium Tabaci, seu herbæ nicotianæ.
- X. Charta signata, & chartæ lusoriæ signatae, earumque monopolium.
- XI. Moderamen & regimen ac inspectio omnium artium, opificiorum, negotiationium, tribuum & collegiorum opificum.
- XII. Fabricæ, textrinæ, artificia & opera manuaria.
- XIII. Commercia terrestria & maritima, eorumque varia genera.
- XIV. Societates asscurationum.
- XV. Coloniarum institutio, & agrorum desertorum cultura, colonorum deductio, collocatio.
- XVI. Viæ publicæ & pontes.
- XVII. Fosiarum purgatio & detersio, & rivorum refectio.
- XVIII. Aquæ libere profluentis procuratio, aggeres.
- XIX. Navigatio maritima, nec non in canalibus, fluminibus publicis, rivis &c.
- XX. Incendiorum avertendorum & restinguendorum media.
- XXI. Platearum, Stratarum & straturæ seu pavimentorum refectio, conservatio.
- XXII. Fora publica.
- XXIII. Fontes & aquæductus, putei, fistulæ.
- XXIV. Lucernæ nocturnæ et lampades urbium, illustrationis et securitatis causa institutæ.
- XXV. Taxæ panis et carnis venalis.
- XXVI. Mensurarum, ulnae et ponderum constitutio.
- XXVII. Reditus civitatum regiarum, earumque, et omnium municipiorum æraria, horumque bona, redditus.
- XXVIII. Res omnis cerevisaria, cerevisiæque coquendæ et dividendæ ratio, quæstus et politia in civitatibus.
- XXIX. Aquarum ardentium, et vini adusti quæstus in civitatibus.
- XXX. Rei militaris procurationes circa itinera militum et exercitus, circa metata et hospitationes militum, circa salgamum et epidemicæ, annonam militarem et commeatum, angarias et parangarias, circa pabuli, fœni, frumenti in horreis militaribus inferendi et condendi rationem.

V. Reliquas vero omnes publicæ administrationis partes, et cæteras res causasque tam civiles, quam ecclesiasticas, quarum cura et moderamen in Borussiæ regno ad Regimen, ad Tribunal, ad judicium aulicum, tam in civilibus, quam in criminalibus, porro ad Collegium Pupillare, ad Consistorium, Regiomonti sedem habentia, spectat et pertinet, sive illæ ab ipsis hisce collegiis, sive sub eorum auctoritate et directione a piis corporibus, magistratibus et judiciis inferioribus procurentur et administrentur, demandamus, committimus et delegamus in provinciis et ditionibus, sub Nostram recens redactis dominationem, *Judicio supremo aulico et provinciali*, quod in urbe Insulæ Marianæ instituimus et ordinavimus, eique omnem auctoritatem, potestatem, jurisdictionem tribuimus, qua dicta Regni Borussiæ Collegia gaudent, ea quidem ratione, eoque modo, ut *Judicium hocce supremum aulicum et provinciale* a Nobis institutum, Nobis et Nostro sanctiori status consilio, ejusque variis pro causarum et negotiorum differentia curiis, nec non superioribus, quæ Berolini sedem habent, Collegiis pareat, subsit, et unice ac immediate subordinatum existimetur.

VI. Hoc proinde *Judicium supremum aulicum et provinciale*, in urbe Marianæ insulae constitutum, omnia in vindicatis hisce ditionibus negotia publica expediet, summi imperii et superioritatis territorialis partes administrabit, Regalium et in primis jurium nostrorum circa sacra procuratione fungetur, omniumque eorum publicæ administrationis momentorum curam habebit, quæ secundum sanctionem pragmaticam die XIX. Junii A. MDCCXLIX. promulgatam, Collegiis Regiminis et justitiæ superioribus, in nostris ditionibus universim, speciatim vero in Borussiæ Regno supremo Regiminis Senatu delegata et attributa sunt. Eo, exempli gratia, spectant litterarum cum vicinis in negotiis ditionum vindicatarum publicis commercium, cura limitum publicorum, tuitio et moderamen libertatis conscientiæ et cultus publici, secundum cuiuslibet de rebus divinis animi sensum; rectio et gubernatio cleri universim; cautio et vigilans provisio, ne ex sacerdotum molinibus res publica detrimenti quid capiat, neve sine hujus, ad administrationem Nostra vice summi imperii a Nobis instituti Dicasterii supremi scientia veniaque et consensu ulla vel Pontificis Romani, vel Episcoporum constitutio, Bulla ac sanctio promulgetur ac divulgetur.

VII. Præter hæc suprema sacrorum jura, quæ Nobis, tanquam Imperanti et Principi competunt, et quorum curam huic dicasterio supra demandavimus, eidem quoque earum rerum auctoritatem et procurationem delegamus, quæ in imperii Nostræ provinciis Consistoriis ecclesiasticis concredite sunt atque commissæ. Catholicis quidem et Romana coletibus sacra jurisdictionem ecclesiasticam, quam hucusque habuerunt, pro ea, qua in eos sumus indulgentia, hac tamen sub restrictione et modificatione clementer servamus atque permittimus, ut hæc solis in causis vere ecclesiasticis et sacris exerceri queat, nec ad causas civiles et sacerulares, clericum licet, vel clericorum redditus, decimas, jus patronatus, vel alias ejusmodi res profanas, sed religionis obtentu ad ecclesiæ tribunalia pertractas concernentes ac respicientes, nec ad crimina et delicta, quamvis specie ecclesiastica indaganda et punienda, extendatur.

Negotia contra ecclesiastica eorum, qui Evangelicæ religioni, sive Lutheranæ, sive sic vocatæ Reformatæ addicti sunt, omnemque in illorum causis jurisdictionem, Consistoriis vulgo tributam, procurabit et administrabit intra ditionum noviter vindicatarum ambitum istud, quod ordinavimus, *supremum Judicium aulicum et provinciale*, cujus ideo consortio adhuc sacerulares et ecclesiasticos adjungere consiliarios consistoriales constituimus.

Causarum matrimonialium, quæ inter conjuges utrinque catholicos disceptantur, cognoscendarum et dirimendarum potestatem permittimus et indulgemus judiciis catholicorum ecclesiasticis.

Quod si vero uterque, vel alter conjugum sacris evangelicis addictus sit, alter autem castra pontifica sequatur, tunc lites et controversiae matrimoniales illorum, earumque disceptatio, et cognitio pertinent ad judicia harum personarum

civilia

civilia, ordinaria, nec ad ipsum istud supremum harum provinciarum Judicium pertrahi aliter possunt, nisi personæ et conjuges in civilibus proxime ejus subsint jurisdictioni. Similiter actiones ex sponsalium pactione, sine discrimine religionis, coram ordinariis et civilibus judiciis intentari oportet, atque institui, nec illas alibi proponere, nec admittere licet.

VIII. Quum porro *supremum* hoc *Judicium aulicum* et *provinciale* eo potissimum consilio institutum sit, ut in ditionibus vindicatis vice Nostra jus dicat: illi omnia injungimus munia, queis suprema in Nostro imperio justitiae Collegia et dicasteria funguntur, nimirum:

- 1) Jurisdictionis civilis administrationem.
- 2) Jurisdictionis criminalis exercitium.
- 3) Supremam tutelam, omniumque rerum pupillarium rectionem et moderamen.

IX. Illa vero munia sese potissimum exserunt, et principaliter versantur,

I. circa rectionem, intensionem, inspectionem et moderamen omnium in hisce ditionibus judiciorum et judicum, eorumque justitiae administrationis.

II. Circa supremam et propriam, quæ illi a Nobis demandata est, jurisdictionem exercendam et administrandam.

X. Abolis vero omnibus supra judiciis, quæ huc usque in ditionibus nuper occupatis viguerunt, et abrogata illis et ademta omni jurisdictione, hæc sub Dicasterii Nostri supremi moderamine et inspectione nunc restat quidem, et servatur

I. nobilibus, et prædiorum equestrium possessoribus, qui patrimoniam et præditoriam jurisdictionem legitimo titulo adquisiverunt, et in rusticos aliasque, qui ibi commorantur, homines ex legitimo titulo haec tenus exercuerunt.

II. Magistratibus municipiorum et urbium, justa jurisdictionis possessione munitis atque gaudentibus.

His quippe, si legitimum acquisitionis et possessionis titulum edere et docere valent, jurisdictionem hac sanctione confirmamus atque adserimus.

Quemadmodum vero juris dicundi munus, secundum constantem et perpetuam Nostram voluntatem et administrationis legem perpetuam, non nisi illis concredi et demandari potest, qui legitimo juris studio eam sibi legum scientiam comparaverunt, quam ardui hujus officii ratio efflagitat, quique publico examine luculenta ejus specimina ediderunt, et ad munus, quod ambiunt, idonei et habiles judicati fuerunt: ita nobilibus jurisdictione patrimoniali præditis, sub pena privationis et amissionis, incumbit, ejus administrationem et curam non nisi tali delegare judici ac justitiario, cuius doctrina legitimo examine explorata et sufficiens judicata, et cuius fides peculiari ad justitiae administrationem sacramento addicta est. In civitatibus et municipiis autem jurisdictionis exercitum et juris dicundi munus non nisi juris peritis magistratum membris, speciatim huic officio destinatis, Consulibus quippe, Assessoriis, Syndicis, Secretariis, Actuariis demandari oportet, qui suam doctrinam et juris scientiam, suamque ad tale munus habilitatem Dicasterio Nostro supremo, examine et scrutinio prævio, satis probaverunt, confirmationem a Nobis impetraverunt, et fidem suam ad juris dicundi munus speciali sacramento obstrinxerunt.

Intuitu omnium vero aliarum personarum, rerum et causarum, neque prædicatoriæ nobilium, neque magistratum municipalium jurisdictioni subjectarum et obnoxiarum constituimus et decrevimus, talia in ditionibus recens occupatis ordinare judicia, *supremo Nostro judicio aulico et provinciali subordinanda*, qualia jam in Borussia regno instituta sunt. Quibus quidem, pro ditionum amplitudine et indigentia numero satis sufficiente instituendis judiciis subordinatis in causis realibus et personalibus jurisdictionem tribuemus et delegabimus illam, quam huc usque judicia supra Nobis dissoluta et abolita exercuerunt. Interea vero

eam à supremo Dicasterio exercendam et administrandam curabimus, id quod causas vel ipsum instruet, et suæ vindicabit cognitioni, vel commissariis delegabit, prout ipsi commodum visum fuerit, vel alia ratione instruendas mandabit.

Omnia hæc, a Nobis confirmata nunc & stabilita non solum, sed in posterum quoque instituenda judicia *supremi judicii Nostræ aulici & provincialis* inspectioni & directioni subsunt, idque providere & vigilare debet omni intentione & rigore, quo ab illis cuivis jus sancte & integre, omnium partium studio & personarum respectu procul habito, absque gratia vel odio dicatur. Quod si igitur quis de justitia ipsi denegata, vel lentius justo administrata, protelata, vel perversa conquerendi ansam causamque habere putet, is medelam auxiliumque ab hoc Dicasterio provinciali flagitare & obtainere debet. Huic vero incumbit, querelis ejusmodi præbere aurem, illis medelam, explorata earum causa, adferre, judicia inferiora officii admonere, excitare, in rectum, si ab eo deflexerint, tramitem reducere, illisque legitimam causæ instruendæ & disceptandæ rationem, viamque monstrare. Judicia inferiora vero tenentur, ejus jussibus, mandatis, admonitionibus, præscriptisque normis sine tergiversatione obsequi & obtenerare. Quicunque judices jussibus & mandatis illius morem gerere & obsequi detrectaverint, vel illis obniti ausi fuerint, severe & omni rigore plectentur, & pro pervicaciæ & obstinationis ratione jurisdictione vel munere privabuntur.

Horum vero judiciorum, Dicasterio supremo subjectorum jurisdictione & competentia intuitu personarum, coram illis forum suum sortientium, *in civilibus causis* hac definitur regula, ut in causis personalibus status & dignitatis & conditionis personarum litigantium habeatur ratio, in realibus vero causis forum rei sitæ absque personarum & dignitatis & status discrimine actori sequendum & eligendum sit, nec possessoris & domini, ejusque conditionis ulla in talibus causis ratio haberi possit.

Jurisdictioni igitur magistratum municipali, vel nobilium prædicatoriæ non subsunt, sed ea penitus exenti censentur, qui vel ob natalium splendorem, vel ob status dignationem, vel ob muneris & officii honorem singulari privilegio fori, seu foro privilegiario gaudent.

Ilo vero fori privilegio gaudent, & illius virtute jurisdictione nobilium patrimoniali & municipali magistratum exentæ, secundum nostrorum judiciorum rationes, existimantur personæ potissimum sequentes:

a) omnes milites, & militaribus fungentes muneribus, cujuscunque ordinis & gradus, qui quippe in militari foro conveniendi sunt.

b) Omnes officiales Nostræ civiles, muneribus ac officiis fungentes Nostris, vel honorum titulis a Nobis condecorati, qui in personalibus causis non nisi coram Nostris tribunalibus & dicasteriis conveniri possunt, & litem suscipere tenentur.

c) Omnes nobilitatis superioris & inferioris personæ.

d) Omnes universim sacerdotes & clerici, cuicunque sint addicti religioni & cultui.

Intuitu nobilium quidem & clericorum suo tempore specialius adhuc definendi Nobis reservamus arbitrium, utrum & quatenus harum personarum exemptarum nonnullas judiciis adhuc a Nobis instituendis, & Dicasterio supremo submittendis particularibus, horumque jurisdictioni subjicere & commendare, & hisce potestatem juris dicundi in illarum causis tribuere & impetriri velimus. Interea illarum in favorem hanc stabilimus regulam, supra jam propositam: ejusmodi personas natalium vel status, vel muneris sacri virtute foro gaudentes privilegiario & principali ac immediato, non nisi Nostris judiciis subjectas & omni nobilium jurisdictione patrimoniali, & magistratum potestate in causis personalibus prorsus & perpetuo exemptas fore & solutas.

Quod causarum qualitatem attinet, judices & magistratus propria & patrimoniali jurisdictione prædicti sese omnium illarum causarum cognitione & tractatione abstinere debent, quæ secundum fundamentalem Nostræ administratio-

nis legem ad curam & jurisdictionem collegiorum domanialium & cameralium, & specialium cum illis conjunctarum commissionum & curiarum, secundum sanctiōnem pragmaticam supra allegatam, & Paragraphum IV. harum Litterarum patentium pertinent & referuntur.

Jurisdictionis criminalis exercitium, ob abusus enormes & exorbitantes, qui huc usque grassati sunt, nemini, nisi legitimū & justū acquisitionis & possessionis titulum edere & docere valeat, permettere possumus atque concedere. Ratione fori autem competentiā eādem regulāe in criminalibus observandā sunt causis, quāe in civilibus obtinent, adeoque criminalis jurisdiction in illas solummodo personas competere, & exerceri potest, quāe etiam in causis civilibus ejusdem judicis foro & potestati subjectāe sunt. Quod si vero ejusmodi casus inciderint, qui moram non patiuntur, & ubi celeri judicis auxilio opus est, tunc judici ratione delinquentis personāe incompetenti, non nisi apprehensio & incarceratio, nec non prima commissi facinoris notio, seu simplex indagatio, non vero cognitio aut sollemnier & accuratior inquisitio permittitur.

Sed legitimis etiam & competentibus rerum criminalium judicibus, qui jurisdictionis ejusmodi, mixtique imperii rite acquisiti titulum edere & demonstrare valent, illorumque arbitrio vitam, famam, libertatem, securitatemque subditorum nostrorum committere, eorumque capita talium judicum & magistratum sententiis subjecere Nobis religioni ducimus. Hisce quidem legitimis rerum criminalium judiciis, justo titulo subnixis, inquisitionem, & processus criminalis instructionem, sed per rite constitutum judicem & scabinos ac confessores minimum duo, sollempni jurejurando adstrictos peragendam & perficiendam, relinquimus & indulgemus. Verum enim vero decisionis & pronunciationis arbitrium & auctoritatem *collegio rerum criminalium* adhuc instituendo reservamus, eaque propter praeципimus atque jubemus, ut judicia illa sese decisione abstineant, actaque inquisitionis rite instruēta cum concepta sententiā formula judicio Nostro supremo aulico & provinciali exhibeant, sententiamque ejus jussu, a collegio ac senatu criminali conceptam, ejusque ulteriora intuitu publicationis & executionis mandata exspectent, iisque sub pena amittendā & admendā jurisdictionis, strictissime obtemperent.

Nobilem præprimis & arduam administrationis justitiae & officii judicialis partem constituit *suprema*, quāe omnibus judicibus & magistratibus incumbit pupillorum, impuberum, minorum, amentium *tutela & cura*. Verum ejus munia, supine hactenus in hisce ditionibus neglecta penitusque posthabita esse comprimus. Serio & severo igitur ejus officia omnibus inculcamus judiciis & magistratibus, iisque commendamus & imperamus, ut supremæ hujus tutelæ partes in suo quisque suā jurisdictionis ambitu, & in eas quisque personas accurate & vigilanter exerceat & expleat, quarum parentes ipsius foro pro sua conditione subfuerunt, vel quāe ipsæ sub ejus jurisdictione fundos & prædia possident, & tanquam illorum confessores illius foro subjectāe sunt, & curatore ad illorum administrationem peculiari indigent.

Quicunque judices & magistratus in explendis hujus tutelæ superioris, quāe illis incumbit, muniis segnes extiterint, ejusque partem aliquam vel dolo vel culpa neglexerint, non modo oscitantiae penas luent, verum etiam pupillis & minoribus, damnum inde patientibus ac læsis, omnem in subsidium indemnitatē praestare tenentur & compellentur.

Quo vero quilibet judex & magistratus suo hac in re officio satisfaciat, & quo minoribus atque pupillis eo certius prospiciatur, Dicasterio, quod instituimus, supremo commendamus, & enixe injungimus, ut judicia ipsi subordinatae vigilanter ea in re observet, & ad explenda hujus superioris tutelæ munia omn occasione exhortetur atque exstimate, suisque monitionibus, mandatis, jussibus, quibus illa obtemperare moremque obsequiose gerere tenentur, illa in hac munieris functione dirigat, moderetur, impellat,

XI. Præter hanc judiciorum, quæ nunc confirmavimus, & adhuc instituemus & ordinabimus, inferiorum inspectionem, rectionem, observationem, quam *supremo Nostro judicio aulico et provinciali* injungimus & tribuimus, ei propriam quoque impertimur jurisdictionem eminentiorem, ejusque ambitu & complexu omnem judiciae potestatis cumulum contineri volumus atque involvi, exceptis tantummodo illis publicæ administrationis partibus, muniisque jurisdictionis, quæ

a) vel judiciis subordinatis, a Nobis jam stabilitis, vel adhuc instituendis, vel

b) collegiis dominalibus & cameralibus competunt, atque incumbunt.

Continentur proinde hujus judicariæ, quam supremo dicasterio impertimur, potestatis ambitu omnes illæ:

a) *jurisdictionis civilis,*

b) *jurisdictionis criminalis,*

c) *supremæ tutelæ*

partes & functiones, quæ in Borussiæ regno *judicio*, quod Regiomonti constitutum est, *aulico & rerum pupillarium Collegio* tributæ sunt, competunt atque incumbunt.

XII. Sicuti autem *supremum*, quod constituimus *Judicium aulicum et provinciale* Nostra vice imperii supremi administrationem exerceat, Nostraque inductionibus a Nobis vindicatis vice jus dicit: ita eidem ad reliquorum Nostræ dominationis dicasteriorum & curiarum superiorum exemplum, potestatem largimur, & auctoritatem concedimus, omnia mandata, jussa, rescripta, decreta, omnesque sententias Augusto Nostro nomine concipiendi & muniendi, eoque utendi curiæ stylo, iisque formulis & titulis, quibus alia Nostri imperii tribunalia uti consueverunt. Quumque hocce dicasterium in jure dicundo & exercendis summi imperii partibus nostram majestatem repræsentet; omnes, qui ei exhibentur & porrigitur libelli supplices, relationes, scriptiones forenses nostris inscribi & insigniri titulis, & ad nostram personam dirigi debent, id quod non a partibus solum, verum a judiciis quoque subordinatis observari reverentia & decori ratio postulat.

XIII. Omnia porro negotia, tam in hoc Dicasterio supremo, quam in judiciis ipsi subordinatis Teutonica lingua & idiomate Germanico expediri & omnes universim libellos, relationes judicum, epistolas, decreta, mandata, rescripta, sententias, protocolla hoc sermone concipi jubemus, præcipimus & imperamus. Qui linguæ Germanicæ imperiti sunt, iis interpretum auxilio subveniri debet & consuli, qui ipsis non modo in conscribendis libellis, sed etiam in explicandis sententiis & mandatis opitulari & operam præstare suam tenentur. Eadem interpretum opera etiam uti judices oportet, si in civilibus vel criminalibus causis personas linguæ Germanicæ ignaras in jure interrogare vel examinare & audire velint. Ubi ejusmodi interpretum fidei exploratae & sacramento obstrictæ copia deficit, sufficiens eorum numerus procurari debet atque constitui.

XIV. Naturalis societatum civilium ratio, ordoque illarum & tranquillitas vetat prohibetque, quo minus quisquam sibi ipse jus dicat sine judice, vimque exerceat privatam. Quicunque igitur nostrorum subditorum de alterius injuria querendi causam habere putat, judicem adeat, ejusque auxilium imploret; quod si hujus iniquitate se gravatum existimet, judicio ac collegio superiori querimoniam exponat suam, & medelam ab illo petat & expectet; quod si etiam hujus se læsum oppressumque injustitia arbitretur, nec hujus se decretis acquiscere posse credat, rem & querelam deferat ad sanctiorem Senatum & Ministerium nostrum, illamque illius curiam, ad quam istius causæ procuratio pertinet.

Patet quoque subditorum nostrorum cuvis via ad solium nostrum, nec ulli unquam audientiam, auxilium, protectionem, tutelamque, modo legitimam habear.

habeat querendi causam, denegabimus. Verum caveant subditi, ne hac Nostra indulgentia, vel querelarum frivolitate ac temeritate, vel falsitate precum Nobis oblatarum, vel contemtu & præteritione judicis competentis proterve abutantur. Quicunque enim hujus sese temeritatis & audaciae reos fecerint, illi non modo Nostram indignationem, sed & pœnam, legibus nostris statutam, eamque severissimam sese incursum sciant.

XV. Idem fere ordo, eademque gradatio locum habet in impugnandis judiciorum sententiis & litium civilium decisionibus. Judicia inferiora & subordinata pronunciant & suis lites dirimunt sententiis in *prima*, quam vocant, *instantia*. Qui illorum sese decisione gravatum putat, eaque acquiescere sese posse negat, is provocare debet intra tempus fatale legitimum ad judicium supremum nostrum aulicum & provinciale, cuius sententia litem in *secunda* seu appellationis *instantia* decidit. Qui de sententia judicij illius supremi aulici & provincialis adhuc conquerendi causam sese habere arbitratur, is ad extreum revisionis remedium confugere, nisi causæ ratio illud respuat, debet & provocare. *Tertia* hæc *instantia* constituta est coram supremo, quod Berolini sedem habet, *Tribunali*, a quo nulla amplius provocatio est, & cuius sententiis lites omnium Nostræ dominationis provinciarum ultimam, constantem, & rescindi ac emendari nesciam sortiuntur decisionem.

In illis vero causis, quoad decisionem *primæ instantiæ* supremo judicio aulico & provinciali tribuendis & relinquendis, quas constitutis judiciis provincialibus subordinatis & inferioribus, accuratius determinabimus & definituri sumus, *secundæ instantiæ* disceptationem & decisionem Collegio Justitiæ supremo vicinæ provinciæ committendi & demandandi Nobis est consilium & animus, ejusque rei ordinandæ Nobis adhuc arbitrium reservamus. Verum ultima seu *tertia revisionis instantia* Tribunal Berolinensi supremo & generali etiam illis in causis semper adserta manet & vindicata.

Secundum prima & fundamentalia rei Nostræ judicariæ principia non nisi tres disceptationum gradationes, tresque instantiæ permittuntur, & sententiæ in tertia & extrema pronunciatae instantia nullo sub obtentu impugnari & retractari queunt.

Sententiæ primæ vel secundæ instantiæ, neglecta provocatione, vim rei judicatæ naœ & consecutæ ejusdem sunt auctoritatis, omnis retractationis nesciæ.

Nos causarum decisione prorsus abstinemus, nec sanctius nostrum Consilium ac Ministerium causis judiciali sententia dirimendis sese ingerit & immiscet, adeoque Nostra, ejusque decreta viribus & auctoritate rei judicatæ prorsus destituuntur.

In criminalibus causis non nisi duæ conceduntur instantiæ, & unica permittitur provocatio, *ulterior dicta defensio*. Sententiæ utriusque instantiæ sub dicasterii supremi auspiciis & moderamine a Collegii criminalis assessoribus concipi debent.

Sicuti vero vita subditorum & libertas Nobis curæ in primis cordique est; ita illorum nemo capitali pœna, vel corporis adfligativa, ergastuli, vel operis publici perpetui & temporarii adficiendus & adfligendus est, nisi pro delictorum genere & gradu ad Nos, vel ad sanctiorem nostrum senatum, ac consilium ministrorum status facta relatione, & probata a Nobis vel ab hoc & confirmata sententia.

XVI. Præter hancce generalem præceptionem et instructionem subditis nostris, judiciisque provincialium recens vindicatarum, legum quoque nostrorum, ordinisque judicarii brevem et luculentam delineationem et epitomen, quam hisce litteris patentibus sub A. adjungendam curavimus, impertimur, qua unusquisque edoceri potest, quo jure utatur, et quam normam in foro, et in negotiis privatis sequi debeat regulam.

Quem-

Quemadmodum vero leges ad præterita non possunt trahi negotia, sed futuris saltim formam præscribunt: ita sponte patet, omnes actus, omnes pactio-nes, conventiones, contractus, pacta nuptialia, testamenta, dispositiones, et negotia qualiacunque omnia, ante harum litterarum patentium promulgationem celebrata, inita, condita, et juris intellectu perfecta, secundum leges harum ditio-num et consuetudines huc usque observatas et usu vigentes judicari, exigi, æsti-mari et censeri debere.

Contra vero a die promulgatæ hujus sanctionis in provinciis et ditionibus vindicatis, et Regno Borussiæ adjectis illæ leges, eaque jura, quæ in illo vigent, et in epitome adjuvata distincte enarrantur, unicam actionum et negotiorum, ordinisque judiciarii, ac forensis disceptationis normam et regulam præbere, co-li, observari et unice pro amissi, præcepto, formula omnium negotiorum et actuum, tam in fôro, quam extra illud gerendorum et expediendorum haberi debent; ita et hac ratione, ut omnes actus hisce juribus legibusque contrarii et non conformes irriti et invalidi censendi sint et judicandi. Cum vero militares æque ac camerales causæ ad aliam administrationis partem spectent, de illis, illarumque legibus et ordinationibus alio Edicto speciali subditos provincia-rum recens acquisitarum edocendos et erudiendos curabimus.

Hanc voluntatis Nostræ significationem omnibus et singulis, tam ecclesiasticis quam sacerdotalibus, clericis ac laicis terrarum Prussiæ et Pomeraniæ, a Regibus Poloniæ huc usque possessarum, nec non tractuum cis anni Noteſium seu Notezam fitorum, ad majorem Poloniæ huc usque relatorum, dominii legitimijure a Nobis vindicatorum incolis sollemniter notam facimus et promulga-mus, iisque, et supremo, quod constituimus judicio aulico et provinciali, nec non omnibus illi subordinatis et subordinandis judicis imperamus et præcipi-mus, ut se et suas actiones et muniorum suorum expeditionem huic normæ ex-actissime conforment, neque ullo sub obtenu scopo Nostro consilioque, prom-tam hisce ditionibus procurandi sanctamque et integrum justitiæ administratio-nem, renitantur atque resistant. Qui vero hæc præscripta nihilominus spernere, iis obluctari, vel refragari ausi fuerint, illi non modo succensionem et indignationem Nostram, sed severissimam quoque et rigorosam animadversionem in-current, proterviamque suam gravi poena expiabunt.

Cujus Nostræ voluntatis notitiam quo omnes et singuli consequantur, hasce litteras patentes, sigillo Nostro Regio et Augusti Nominis subscriptione munitas rite et sollemniter promulgandas curavimus. Datæ Berolini die xxviii. Septembris A. MDCCLXXII.

FRIDERICVS.



de Fürst.

